

留

青

日

札

留青日札卷之二十七

錢塘田 藝蘄子執撰

倩徐懋升玄舉 校

寺觀

漢明帝遣蔡愔使西天竺國請摩騰歸漢舍于鴻臚寺殊不知寺者止也又曰嗣也治事者嗣續于其中也鴻臚乃今四夷之館故暫舍之無何後于東都門外建精舍以居之因白馬馱經遂曰白馬寺而僧之備寺之玷遺禍萬世矣晉孝武奉佛法遂立精舍于殿內引少門居之至宋徽宗宣和詔改寺曰宮院曰

觀以尊奉道士殊不知觀者觀也兩觀所以登高以望雲物以懸法象漢之東觀所以藏書初非事異端之處惟黃帝內傳置元始真容于高觀上此偽書也

### 蘭若

梵言阿蘭若皆知曰寺也或曰無諍也或曰空靜處也殊不知蘭香草也若乾草也卽所謂清淨草菴之意人皆不原字義故其說不明

### 戒壇

杭州昭慶寺每年三月開戒壇爲天下僧人受戒之所故名曰萬善戒壇禪家五戒一曰不殺生命二曰

不偷盜財物三日不聽淫聲美色四日不飲酒茹葷

五日不妄言戲語今則僧尼雜處道俗混淆四時遊

戲群集實爲淫亂葷臚之壇矣在宋時戒壇僧尼爲

姦太祖深惡之開寶五年詔曰僧尼無間實素教法

應尼合庵者只許于本寺起壇受戒令尼大德主之

如違重置其罪許人告也貽謀錄中載僧戒壇中公

然招誘新尼受戒不至者反誣以違法噫弊也久矣

嘉靖三十五年倭寇臨北關都御史李天寵焚之乃

五月六日也不數年總制胡宗憲重建煥然勝昔遊

僧復來四十五年春巡按龐公按察徐公王公秦公

殺然痛禁異端絕影真一快事隆慶三年己巳閏六月六日戌時爲雷火一夜焚盡蓋天將滅之也

### 重陽菴

重陽菴在吳山之東人多不知其所取義今南山地名道姑灣掘土五六尺卽見菴基磚瓦無念且有假山皆太湖佳石土人云重陽女菴也與地名道姑灣相合城中重陽菴郡志不載其故而石壁但有元天師廣微子所書大重陽菴字則此或下院也但重陽之名不見于宋或曰始于元大德年間或曰重陽女乃宋高宗二宮人出家于此益香火院也此又臆說

西京賦曰集重陽之清激汙曰神明臺高既除去下地之埃穢乃上止于天陽之宇清激之中也道書言上爲陽而清又爲陽故曰重陽

### 皮場廟

王叔永載行都試禮部者皆禱于皮場廟皮場即皮剝所也建中靖國元年六月傳聞皮場土地主瘍疾之不治者詔封靈貺侯廟在萬壽觀之晨華館館與貢院爲隣不知士人之禱始於何時館何因而置廟也今杭州皮場廟在吳山上應試士子尚多禱之亦有禱于江東廟文昌祠者或曰宋時有禱于游子

夏名二相廟者今何不禱于先聖孔子廟邪余曰仲尼與爾輩不合方怪爾輩安肯保佑邪或曰何也余曰深怪宋儒破碎章句注腳違悖聖經而當今排偶浮靡時文相去又甚遠與已爲仇故耳聞者絕倒

### 晏公廟

太祖渡江取張士誠舟將覆紅袍救上且指之以舟者問何神曰晏公也後猪婆龍攻崩江岸神復化爲老漁翁示以殺鼉之法問何人又曰晏姓也太祖感之遂封爲神霄玉府都督大元帥仍命有司祀之今江海著靈甚顯昔宋高宗渡河有泥馬引途之異

故杭州有白馬廟祀之元世祖取江南欲渡黃河苦  
乏舟夢一老叟指引明日果見一人先涉濟軍遂封  
爲荅剌罕與五品印撥三百戶食之信乎帝王之興  
天與人歸自有靈兆也

東明寺

東明寺在錢塘安溪去吾鄉不二十里相傳建文皇  
帝爲僧曾居此寺舊傳廁制如樓與人家頗異後流  
廣西歸老北京宮中稱曰老佛崩時欲謚爲神宗而  
朝廷不允葬西山銘曰天下大法師之墓初建文之  
自焚也葬祭以天子之禮駙馬都尉梅殷軍中發喪



留青日札 卷之二  
四  
篇素私謚爲孝愍皇帝後王事楊循吉致仕遣子奏  
復建文帝號孝廟亦不之罪

和尚道人仙人通稱

佛圖澄本天竺人少學道妙通玄術勒後因忿欲害  
諸道士并欲苦澄又勒大笑曰道人謬矣又勒益重  
之寧必詔而後行號曰大和尚又百姓因澄故多奉  
佛皆營造寺廟相競出家真僞渾殫多生愆過石虎  
下書料簡其著作郎王度奏曰佛外國之神非諸華  
所應祠奉漢代初傳其道唯聽西域人得立寺都邑  
以奉其神漢人皆不出家魏承漢制亦循前軌今可

斷趙人悉不聽詣寺燒香禮拜以違典禮其百辟卿士下逮衆隸例皆禁之其有犯者與淫祀同罪其趙人爲沙門者還服百姓朝士多同度所奏石虎以澄故下書曰朕出自邊戎忝君諸夏至於響祀應從本俗佛是戎神所應兼奉其夷趙百姓有樂事佛者特聽之虎太子邃且名其子曰小阿彌又僧亦可稱仙人昔道開從西來日行七百里太史奏石虎云有仙人星見當有高士入境見高僧傳

### 火居火宅

今道士之有室家者名爲火居道士唐鄭熊番禹雜

記廣僧有室家者謂之火宅僧又陶穀清異錄京師大相國寺僧有妻曰梵嫫亦曰房老則道有妻者亦當日道嫫俗言道婆佛妻名即須見蓮經注洪武六年令民家女子未及四十者不許爲尼姑女冠二十年令民年二十以上者不許爲僧二十四年令民有效瑜珈教稱爲善友假張真人名私造符錄者皆治以重罪二十七年令僧道有妻妾者許諸人趕逐相容隱者罪之有稱白蓮靈寶火居及僧道不務祖風妄爲議論阻令者皆治重罪永樂十年諭天下僧道多不守戒律民間修齋誦經較利厚薄又無誠心

甚至飲酒食肉游蕩荒淫畧無顧忌又有無知愚民  
妄稱道人一槩蠱惑男女雜處無別敗壞風化即揭  
榜申明違者殺不赦

喪葬用僧樂

今俗疾病則用僧道作齋醮喪死則用僧道作道場  
送葬則用僧道爲引導不惟愚民之家雖士宦亦有  
爲之者間爲正人君子之所譏笑則託名曰我固知  
其非禮奈此先人遺命不敢違也嗚呼君子從治命  
不從亂命何惑于異端如此哉宋開寶三年詔開封  
府禁止士庶之家喪葬不得用僧道威儀前引此崇

正道厚風俗之大端也又太平興國六年詔禁送葬不得用樂庶人不得用方相魘頭皆良法也

僧道不拜

律僧道不拜父母唐傅奕奏高祖云不忠不孝削髮而揖君親是亦不拜也

妖僧

妖僧行果云自海上來杭州多技善幻以符說禁治病人輒愈人或訛言曰仙時劉郎中景寅吳員外郎鼎咸得告家食聞行果名召之與語大悅受辟穀運氣汰屏人扁室以一偃子守之行果則往來二子所

指授也頃之劉忽瞑眩欲死以語行果行果曰是將  
遊神神遊而復可以昇矣又頃之瞑眩益甚若有物  
冉冉自口脫于几上爲么人長不滿指盤辟而歌纖  
如蠅聲劉問曰爾何爲者曰吾君之元神也偃子駭  
而大講么人忽亾劉遂僵仆移時而甦叩之若寤語  
不憶矣遂得悸病忽忽三月而卒吳旣受法瞑眩時  
作如劉然不知劉已死惑于行果信之益篤一日忽  
大叫曰八仙至矣躍起若肅容狀吳病跛不良于行  
至是步武舒展刻如也俄而空中語曰吾將采白鳳  
之膏蒼龍之髓續爾筋骸吳謝曰謹俟仰旣而家中

百怪朋作犬登竈而嗥嬰兒反接若桎梏而啼家人  
大懼無何行果突至吳且擊且罵曰妖禿爾賊任氏  
剗其二稚爲幻世間吾今訴帝殺汝矣行果瞿瞿狼  
竄出門不知所往而吳亦病悻判年始痊詢之二子  
之家果然怪亦甚矣妖僧所作不知果何術也家大  
夫言采生汰吳之子邊晦爲按察副使余得其詳

#### 四方光明電王

電陰陽激曜與雷同氣發而爲光也世人以雷爲雷  
公漢王仲壬嘗辨之矣而異端又以電爲電于則尤  
可笑金光明經曰四方光明電王東方阿揭多電王

南方阿祇嚕電王西方主多光電王北方蘇多末尼  
電王豈吾儒所謂風伯雨師者有以倡之邪

### 磨衲衲孟

磨衲者高麗僧衣也甚精好爲禪師法衲衣孟卽衣  
鉢見松漠紀聞余欲改爲衲孟更新西域緝木綿花  
織成布曰屈胸布後人以碧絹爲裏是達磨所傳者  
名曰信衣又釋伽佛將金縷僧迦黎衣傳與迦葉爲  
佛始祖卽大衣也

### 佛牙

西湖法相寺中藏一異齒其大如拳正碧綠色透明



山僧云是佛牙以誘婦女奉禮請觀獲利也其狀如盤牙想是西域異獸口中者且云此佛丈六金身如有此牙則須十六丈長乃可容此頭也古人所載那衍國有金輪王齒長三寸豈是物耶唐傳奕以羚羊角扣碎婆羅門僧佛齒五代趙鳳以斧砍碎西域佛牙我朝正德九年正月十六日乾清宮災吏部尚書楊一清上言五事其三謂不宜創梵宇于西內蓋禁中自來有佛堂釋殿惟正德中因近習張銳張雄錢寧等以佛事蠱惑武宗引西番僧出入禁內至今上始議除去命武定侯郭勳大學士李時禮部尚

書夏言入看大善殿內有金銀鑄像夷鬼淫褻之狀  
鉅細不下千百餘金函玉匣藏貯名爲佛骨佛頭佛  
牙之類枯朽摧裂竒離傀儡亦計不下千百片言請  
瘞之草野不得瀆留清禁以求杜愚冥眩惑之端請  
將佛骨佛牙一切付之于火以滅其跡其金銀銅像  
亦併令煨銷實爲千古稱快而萬代瞻仰者也寶嘉  
靖十五年五月二十日夏言題請遂皆煨滅計佛骨  
骨牙齒不下千百斤又何其多也其所爲男女淫褻  
之像者名曰歡喜佛傳聞欲以教太子蓋慮長于深  
宮之中不知人事故也今 皇上毀之誠可謂端本

之教矣漢成帝晝紆踞妲已而坐爲長夜之樂于屏  
又戴王子海陽立十五年坐晝屋爲男女靡交接置  
酒請諸父姊妹飲令仰視晝此淫圖之始也胡元伶  
人詹俊子爲淫亂之物此淫具之始也所謂歡喜佛  
者想亦此類其殿名曰大善乃大惡也

### 念佛婆

今燒香名念佛婆者人家老婦衰敗無所事事乃怕  
死修善結會念佛如古白蓮教皆爲師姑尼姑所引  
因而成群傾國老幼美惡無不入會淫僧濊道拜爲  
乾娘而淫婦濊妻又拜僧道爲師爲父自稱曰弟子

晝夜姦宿淫樂其丈夫子孫亦有奉佛入夥不以爲耻大家婦女雖不出家而持齋把素袖藏念珠口誦佛號裝供神像儼然寺院婦人無子誘云某僧能幹可度一佛種如磨磨過氣之法即元之所謂大布施以身布施之流也可勝誅邪亦有引誘少年師尼與丈夫淫樂者誠所謂歡喜佛矣戒之戒之

### 假師姑

隆慶庚子妖僧圓曉穿耳纏足粧飾爲假師姑至餘杭哄誘念佛婦人淫媾甚多雖富貴之家不免其汙事露送縣賄釋按察吳公擒之盡發其姦醜嚴滿邑

乃號令通衢致之死刑則又頌啟滿省矣總制郭公  
薦剡所云開運河而百姓騰懽擒妖僧而一方稱快  
正謂此也吳公名教傳朝城人崇正闢邪真王政也  
僧道托生 僧道名下

房瑄是末禪師李白是金粟如來崔曙是泰山老師  
張方平是琅琊寺僧蘇軾是杭州壽星院真戒和尚  
王十朋是族叔之師嚴仙威史彌遠是覺園黎馮京  
是五臺僧真德秀是浦城草菴和尚我朝尚書常州  
胡濙是天池僧進士太原王瑄是西番僧豈輪迴之  
徵邪又六朝文人多以僧道佛命名甚可鄙笑而文

天祥正氣君子也乃名其二子曰道生佛生今洪武時東川侯胡海第七子名和尚第八子名行者見學士劉三吾所撰墓志鞏昌侯郭子興次子名官僧永樂十五年丁酉福建榜有顧佛童楊佛童薛佛劉童皆生員中式

儒者奉佛

宋尹和靖拜迎天竺觀音在虎丘每旦頂禮佛念金剛經今之士大夫托名逃禪往往修齋誦經事佛甚虔至有捐妻捨女以奉僧道者每至醜態敗露動經法司破家亡身不齒士類 州文武之家如 少卿

許指揮之輩甚可嗤笑也嗟夫古之胡后却曇獻之扇徐妃贈瑤光之枕龜茲王女納于鳩摩羅什千金公主偶于淫毒丐僧彰之史冊遺臭萬世彼獨不監邪

曇霍膽巴

僞檀女病病甚請救療曇霍曰人之死生自有定期聖人亦不能轉禍爲福曇霍安能延命耶正可知早晚耳元僧膽巴曰佛法猶燭籠風雨至乃可蔽若燭盡則無如之何正所謂藥醫不死病佛度有緣人也或世愚民可笑可笑

布袋和尚 灰袋道士

布袋和尚者號長汀子在奉化縣岳林寺嘗蟠腹以  
荻荷一布袋凡供身之具盡貯袋中隨處偃臥天將  
雨即著濕草履驟行途中遇亢暘即曳高齒木屐豎  
膝而睡梁貞明三年于寺中東廊石上端坐而逝今  
縣北二里塔亭山上有鉢盂佛跡宋岳珂贊曰行也  
布袋坐也布袋放下布袋多少自在元布袋者景元  
號此庵永嘉人叅蔣山圓悟禪師有得悟曰我這裏  
師禪都被元首座一布袋盛去也因呼爲元布袋又  
灰袋道士蜀中人乃唐時陽狂異人也



豬頭和尚 魚肉道人

和尚宋衢州人戒律精嚴平生惟嗜食豬首人以豬首與之日食數十枚曾不見其骨人皆異之稱爲活佛與趙清獻公友善今骨相尚留定光寺中從者捧一豬首侍之仍當時之名故曰豬頭和尚廟其壁有石刻趙公碑記魚肉道人者成都人宋大觀中生而手足攣縮瘖不能言遇異人以藥一粒納口中遂能言語動作知隱匿事至羅浮山謁王野人名靚野人曰子可教取魚肉與之食道人自此能食生肉號曰魚肉道人紹興末封達真先生此四人正好作對或

戲曰猪頭和尚可對吾鄉狗肉道人

三教

元字木魯。神子肇曰：釋如黃金道，如白璧儒，如五穀。當時以爲名言。余則以爲釋不如鐵道，不如石蓋。二氏無益于世，徒耗五穀耳。佛者言其弗是人也，猶言俳者言其非是人也。以俳爲倡優者，言其人之猖狂而可憂也。惟釋害人最大，在元有白蓮教，滿摩教，回教，頭陀教，各自有宗。猶道之符水教，儒之道學教，其亂天下，一也。儒之有道學，即五穀之有稷，稗耳。

姚廣孝

廣孝幼名天禧長州人世醫從相城道士席應珍席  
通儒多異術質敏盡得其傳嘗白父不願醫願仕以  
顯父母父不從一日入城見僧官驛從之盛嘆曰僧  
亦富貴如此邪元壬辰年遂出家入里之妙智菴改  
名道衍游學江湖工爲詩文洪武癸丑請給禮部度  
牒于覺林寺入冊四年詔收高僧至則以病回八年  
詔通儒廣孝以僧訛禮部中不願仕贈僧服還山及  
壬戌九月詔選高僧分侍諸王廣孝往燕王府任持  
慶壽禪寺十五年孝愆皇后崩親王各奏乞僧修齋  
于是左善世宗初季潭舉之遂見知于成祖預建靖

難之功壬午十月拜僧錄司左善世永樂甲申三月  
簡東宮輔導擢太子少師因賜今名不拜惟受章服  
仍居慶壽寺及太孫就學命設講席于文華殿之東  
復令廣孝及翰林內閣諸臣侍焉九年考滿爲壬辰  
二月給與誥命封贈祖菊山父妙心俱贈資善大夫  
祖母周氏母費氏俱贈夫人併本身凡五道終身不  
畜髮不娶妻今寺中有方面紅袍玉帶髻頂戴唐帽  
像者存焉卒年八十四義子曰繼錄功爲尚寶司少  
卿廣孝贈榮國公謚恭靖配享成祖廟廷或曰初名  
衍字斯道成祖嘗賜兩宮人逾月不近上乃召還之

嘉靖九年移祀大興隆寺罷侑享禮也

大光明佛

烏思藏大乘法王居西天日落佛國東土永樂三年  
誥封萬行圓融如法最勝弘慈廣濟護國宣教正覺  
如來大乘法王西天上善金剛普應大光明佛凡三  
十六字法號十一年喃葛兒藏卜來朝封爲灌頂弘  
慈通慧國師給金印嘉靖十年應襲崑葛鎖南扎叭  
堅叅巴藏卜西番字表一通時通把人等譯之曰上  
位人皇帝主大法皇帝前烏思藏應襲大乘法王崑  
葛鎖南扎叭堅叅巴藏卜差使臣崑葛班鳩兒等拜

奏上位登大寶位萬萬年金身堅固猶如須彌天下  
太平四海一家聖意公無間遠邇我烏思藏高僧刺  
麻僧俗人等時常祝延聖壽萬萬歲今于鼠年具印  
信番本一道并年例方物赴京進貢銅佛銅塔舍利  
珊瑚犀牛角紫紅白足力麻左髻海螺黑香礪砂茜  
草胡黃蓮毛纓紅白黑鐵刀麻氍毹等件又廂嵌甸  
子無量鍍金佛一尊畫像釋迦佛一幅舍利十顆金  
五錢

朱正增

正增本姓穆正德間魏彬誘見投充義子賜姓朱氏

與周一潁卽周伴兒馬時明卽馬福壽真人李雲峯  
卽李躩住右至靈轟一然卽轟道兒附權奸魏彬陳  
應循等以賊充軍嘉靖三年復以傳奉夤緣爲奸家  
大夫在儀制劾之曰先朝宿靈盛世遣奸鑽刺榮身  
賄賂脫罪朦朧陳乞豈天聽之能周依附營求信國  
法之難宥有傷聖化自玷宗風乞正典刑以杜奸孽  
十年十月有旨都饒他着照舊焚修又給還度牒皆  
顯靈宮靜虛觀道士也自後濫觴而左道興矣邵真  
人陶真人符籙妖惑最盛而陶爲之魁陶仲文黃岡  
人由倉官封恭誠伯祿一千二百石隆慶初追戮

卷之二十八

錢塘留藝蘅子純撰

倩徐懋升玄舉校

道士主禮樂

我朝祭祀禋禮者太常寺之道士奏樂者神樂觀之道士皆異端也天神何爲而格哉至于府州縣則樂奏于道士相禮者乃吾儒也聖賢與異端正相攻擊而侏儒在所必誅者安肯復來享乎周禮天子大祀禮主于大宗伯樂主于大司樂此所以盡誠盡物郊則天神格而廟則神鬼享也洪武四年擇監生及



文武大臣子弟在學校者充樂舞生此祖宗崇正闢邪良法美意也何莫舉而行之哉又正統三年登祀孔子于釋者宮祭物非所產者以所產代之如今之小縣不出鹿者以羊代鹿而近日上司至以山縣出鹿者今以羊代仍追鹿價入已誠敬何在嗚呼爾愛其金我愛其禮也曾謂仲尼享此不及物之祭乎

布政使司城隍廟

京師都城隍廟以天下十三省城隍之神配享禮也仲夏皇帝遣官致祭南京仲秋祭之則各省當立布政使司城隍廟乃禮也如浙江則當題其主曰浙江

等處承宣布政使司城隍之神而以杭州府城隍六  
神配享置主于殿中之左又次而以仁和縣錢塘縣  
城隍之神分配于東西兩廡庶幾享體合宜今但稱  
杭州府城隍是上無一省而下無兩縣也與府縣分  
祀孔子之制有異又總制部院三司蒞任之日必齋  
宿詣廟而反行四拜禮于一府之神是以親臨上司  
而跪拜于屬官也何冠履倒置幽明悖禮之若是哉  
不若齋戒拜謁于先師孔子之廟亦爲合禮也世有  
議禮君子舉吾言而奏行之以正祀典以妥神靈亦  
可以禱國家二百年之缺典也

伏波將軍有八人

漢有兩伏波將軍前邳離侯路博德後新息侯馬援  
蘇子瞻嘗辨之家大夫嘗遊南海龍王廟廡下有神  
號伏波曹將軍詢之土人云唐時新羅使入貢夜夢  
有神介而持戈曰予爲南海伏波曹將軍也龍王遣  
我護汝但渡無苦明日風浪大作見一人出波心以  
手按怒濤旋滅遂立祠于此余又見史言鍾士雄陳  
伏波將軍嶺南酋帥也晉虞瑤博學強識仕至伏波  
將軍墓在寧波慈谿縣西南六十里五馬山上又葛  
洪爲將兵都尉攻庾冰別帥破之遷伏波將軍是本

傳秦索菱仕符堅至伏波將軍見其兄索泮傳內又  
晉周處傳乃使隸夏侯駿西征伏波將軍今嶺海多  
伏波廟而雷之徐聞濶之烏蠻灘香火尤盛士夫客  
商往來必禱祀乃濟詩人詠伏波者但知馬援不知  
有其七余過其廟故詳紀之

### 武安王

後漢延岑自稱武安王於漢中又秦將白起則封武  
安君後關雲長亦封武安王有客爲余召箕一日降  
壇其勢甚猛書云威鎮華夷義勇三分四海才兼文  
武英雄千古一人余曰公乃武安王邪復書曰諾余

日聞公之靈誓不入吳何以至此又書曰赤鬼騰霧  
汗雨零青龍偃月血風腥曉來飛渡烏江上始信天  
亡最有靈客皆惛然蓋不獨見公之英靈千古不昧  
而隱然非戰之罪自寓于言表矣神之無所不至故  
如此其著邪今通志常德府龍陽縣本漢武陵郡索  
縣地東漢爲漢壽縣而武陵縣陽嘉中一名漢壽吳  
曰吳壽又劉宋有晉壽郡今成都也亦其一證云

神助陣

嘉靖乙卯倭寇大作直攻會城余鳩集鄉兵千人爲  
保障計猶恐人心不安乃擇白築高壇于西郊以順

金方肅殺之氣刑性插血爲文告天以求助于古今  
名將自武成王而下三十餘人後賊臨方山四日不  
退鄉兵迎敵不戰而遁四方被擄人回云賊人西望  
見雲中神兵衆多金甲神將形甚長大旗幟分明是  
以不敢交戰而去也衆皆聞言踴躍感悅靈應已畧  
載之回瀾橋記中余憶古今此事常有如晉王導以  
儀物鼓吹求助于鍾山之神以禦符堅其後八公山  
草木皆兵唐太山陰兵助戰以破李師道我朝真  
武之神助成祖以破胡虜又杭州都指揮使李公祭  
告岳武穆王墓請岳雲所貽鐵鎗以破桃花洞賊是

也此皆正神大道吾儒所當行者但如唐之使妖僧誦呪祈禳宋之宰相閉門修齋誦經則不可耳方倭寇焚燒湖市時城中官府及鄉士夫亦有就寺觀設醮燒香祈保退敵者左道惑衆可耻之甚也正神乃肯助正人若邪神必反助妖人矣因思國制旌纛上所圖天王等像又不知何名或昉于天寶間不空三藏之術也

### 家神卻盜

燭溪胡胡家有群盜破門而入見其家堂上有三四老人會飲燈燭掩映鼓吹不絕賊皆驚走實其夜無

人也乃家之先神耳異哉

### 彭祖

顓頊之孫陸終氏之第三子母鬼方氏孕十一年而生姓箴名鏗自堯歷夏殷之末已年七百餘歲封于韓大彭故孔子稱老彭周衰浮游四方入蜀留家武堂山王逸楚詞注彭祖好知滋味善斟雉羹以事帝堯司馬彪莊子注彭祖八百猶悔不壽恨睡晚而嘆遠又曰彭祖餌雲母御女數十晚娶妻鄭氏妖浮敗道而死非壽終也仙傳云彭祖年八百歲喪四十九妻五十四子可謂多壽而窮苦孤獨者矣武進薛應



旂作四書人物考失載故并錄之

西域天竺二國求老子象

天竺二國破降王玄策其迎沒路國獻異物并上地圖請老子像夫老子既曰出西域至流沙而西域之國反來中華求象可發一笑

木鑽鐵杵

世所傳木鑽穿石盤乃老君之于傳先生也石上磨鐵杵乃真人之于玄武帝也

施存

施存齊人孔子弟子三千之數自號姚益子得遁變

化景之道今中岳少室之壺公是也見真誥云未受  
太上書猶未成真其行玉斧軍火符是其所受之枝  
條也

呂紹先 何仙姑

呂品字洞賓幼名紹先京川人二十不從婚娶會昌  
咸通時舉進士滯場屋者二十三年五十道始成祖  
渭禮部侍郎父讓海州刺史余嘗召箕洞賓降書云  
輕揮羽扇平分湘水烟霞泉石爲佳侶清風兩袖膽  
氣粗洞庭飛過經千里飽嚼瑤華醉斟玉髓乾坤收  
拾葫蘆裏一聲長笑海空秋數着殘棋山月起未書

日踏莎行余請作西湖賦卽運箕如飛筆不停綴有  
云蔡碧落之兩峯臥白雲于三竺六橋水流魚與俱  
四賢堂寂鹿獨宿真佳句也客有戲之者曰公之仙  
姑何在卽書云仙姑至矣箕停少選復書云閬苑蓬  
萊自可人東山人駐幾千春要知古女真消息碧漢  
青天月一輪余曰非藏何仙姑三字邪復書曰然然  
然余出一句曰日月爲明分晝夜求之屬對箕卽應  
之曰此拘于字難對聊對一句乃書曰女生合姓別  
陰陽客又戲之曰適見洞賓否箕忽震怒者久之復  
書曰仙友從來有洞賓爾今問我是何因婉始自許

逢周穆姜女誰知與亂臣烈火精金應不鑠蒼蠅白  
蟬未嘗磷道心清淨渾如水不學凡間犬豕人何仙  
古者廣東增城人生而項有六毫所居地有雲母忽  
夢異人教之服餌唐景龍中仙去今有雲母嶺永州  
志云何仙姑幼遇異人與桃食之遂不饑能知人禍  
福宋魏野云潭州夏鉤過永州問姑曰世多言呂先  
生今安在姑笑曰今日在潭州興化寺設齋鉤到潭  
日取寺中齋曆視之其日果有華州回客設供蓋呂  
洞賓自稱華州回道士見岳州一統志又浙江志載  
巖州婦女唐廣真與夫相離從師修道徑謁何仙姑

後遂得仙則仙姑之事信矣

藍關雪 潮臺雨

韓退之貶潮陽至藍關遇雪其姪韓湘字北渚冒雪而來故有知汝遠來應有意之句又宰相劉瞻其兄劉瞻幼好仙術有道士至門謂之曰能相師乎曰諾即隨之入羅浮山後四十年瞻被貶逐至潮臺泊舟有少年冒雨而來乃瞻也自言已名列仙籍矣悲喜不勝一夕不知所往二事相類又皆唐人真異也

麻姑

唐顏魯公作麻姑壇記載事甚詳在江西廬山今藏

布政使司庫名曰換金碑以其難得也人皆不知其  
原麻姑者乃後趙石勒麻胡秋之女其父猛悍人畏  
之繁城嚴酷晝夜不止惟雞鳴乃息女憐之假作雞  
鳴衆雞皆鳴衆工乃止父覺而撻之女懼而逃入黃  
州仙姑洞修道後于城北石橋飛昇名其橋曰望仙  
今羅田有麻姑崖

祠山張大帝

武當人張秉遇仙女山中謂曰帝以君功在吳分故  
遣我爲配生子以木德王其地且約踰年再會秉如  
期往仙女抱幼子歸秉曰當世世相承血食吳楚後

生子渤爲祠山之神今廣德州橫山有廟志云生西漢末遊茗嘗之間夫人李氏亦有昭妃廟至今香火甚盛以二月八日生辰先一日必多風後一日必多雨俗人相傳以爲神請其夫人之小姨飲酒故加以風雨欲視其足也可謂瀆神矣然至今此日風雨甚驗亦異事也又有埋藏之異是日土人殺牛祀之坎其庭中以所祭牛牲及器皿數百瘞于坎中明日發視之空坎一無所有

張果老

張果古仙人能著書見通志又張果老乃唐玄宗時

神仙見柳氏傳聞今有張果老倒騎驢圖

革天師

天師之名起于莊子徐無鬼篇曰黃帝再拜稽首稱天師而退在漢爲五斗米賊今於潛乃道陵所生處宋林積爲南劍太守送張天師之子于獄而奏曰其祖乃漢賊不宜使子孫襲封元詔三十六代張天師朝京錫以金印封留國公主領江南三山符錄道教事太祖兵取江西張四十二代孫正常字仲紀遣人來見自後六朝京師洪武初上謂群臣曰至尊者天豈有師也以此爲號褻瀆甚矣遂命去其舊稱俾



爲大真人改天師印爲真人印秩正二品二十四年授真人張宇二品銀印後別授六品銅印文曰龍虎山正一玄壇之印英宗易以金印文曰正一嗣教大真人府之印弘治間賜以玉印文曰陽平治都功印蓋府有張道陵所傳玉印一枚其文如此乃雲篆而陽平治卽蜀之陽平山二十八治之一道陵起處也朝廷恐其隨身有失別作此賜之嘉靖十七年真人朝覲與余舟聯泊彭蠡湖星子驛口半夜雷雨大作霹靂震死齋教一人亦快事也凡一千四百餘歲相傳五十代至隆慶元年乃革天師之號止稱真人追

奪其玉印又聖世一大快事也

神君

今淫祠邪神所稱神君者起于漢武帝乃長陵女子以乳死見神于先後宛若祠于室平原君亦往祠子孫貴顯故上求神君舍之上林中硯氏館聞其言不見其人云卽嘉靖初鎮江以北之靈哥類也

堂上堂下房中道中邪神

漢高祖四年梁巫祠房中堂上之屬荆巫祠堂下之屬師古曰堂下在堂之下武帝天漢二年秋止禁巫祠道中者今俗人信巫尚有此數祠其祭陳設不同

自尋日木 卷二十八  
如此當痛禁之

風流神

洞庭包山林木陰森居民稠密近有風流神在東灣  
茹家園軒中能呼人姓名談世隱事自言終南山道  
人每出酒果樂賓彼則暗處陪語濛濛洞洞言諛諛  
浪亦善吟咏有曰自入空山歷歲華幾經葉落幾經  
花諸君問我原蹤跡太華峰頭第一家洞庭秋水碧  
玻璃口浸東方月浸西萬里紅塵渾不到可能着我  
道人棲暝煙一抹起山城返照林間石壁晴多少  
臺榭倒景獨能容我看分明其所說事驗于前而昧

于後不知其爲何妖也

二郎三郎神

灌口二郎神在四川灌江口 和合二郎神市井商賈所祀者 竹王三郎神漢夜郎縣 泰山三郎神後唐雄威將軍即炳靈公也 草野三郎神獄訟所祀者 五郎神卽五通也一作五顯五聖吾鄉有五郎山神姓田氏鄉民奉事甚虔今爲朝議公墓地

王喬

王喬周太子晉善吹笙作鳳鳴浮丘公接上嵩山二十餘年仙去見劉向列仙傳汲冢書載王喬卒時

年止十五六是可謂夭非所以爲壽也裴秀冀州記  
緱氏仙人菴者昔有王僑犍爲武陽人爲栢人令于  
此登仙非王子喬也又陳書周文育傳王琳令所親  
宦者王子晉掌視之又葉縣令王喬飛鳧舄者

### 兩沉女巫

女巫卽今之師娘最能左道惑民古人巫蠱之禍皆  
起于此蓋能出入宮闈閨閣故耳漢鄴郡守西門豹  
沉女巫五人于河伯娶婦又晉陽令狄惟謙沉女巫  
郭天師于河皆大丈夫爲治之正法也

### 妖報

漢武帝好仙而終歸茂陵梁武帝奉佛而餓死臺城  
宋徽宗信道而流離五國或曰鹿皮公吞玉華而尸  
蟲王西城漱龍胎而死訣仇季子咽金波而梟徹司  
馬季主服霜散而首落黑狄吞紅丹而投水甯生服  
石腦而赴火柏成納靈氣而腸腐嗚呼異哉真異端  
之異殺也

閉氣道士

嘗見一道士能爲閉氣之術每夏夜裸卧任蚊蟲嗜  
身畧不扇動待其齊集甚衆然後禁閉其氣膚理輒  
實若吸住其喙牢不可脫者雖起而行走亦不失落

飛聲嗡嗡然良久甚疲乃放氣縱之使去其蚊嘴散  
再不復能嗜人矣或有就身撲殺者亦不之禁曰此  
物毒人殺之無罪過也

使鬼法

世有采生摘割之法今越人亦能之有宋文元者以  
教書在余外祖餘杭徐家能役使鬼每呼仙童則其  
鬼卽至但無形聲耳命之移卓椅則卓椅行動自能  
整齊命移置庭中自能出戶命之斟酒杯盤自行或  
剪紙爲神形貼于壁上以水一磁命之手執則其碗  
自吸于壁而水不傾覆一夕有錫工同窺宋惡之命

擊其牀則飛磚走石鬼驚鬼喪乞哀移寢而止不知果何術也毋舅歷山公從業今時時能言之

### 鬼殺咸寧

嘉靖間大學士夏言侍郎曾銑皆不得其死及咸寧侯仇鸞疾篤親見二公守之乃于牀上稽首謝罪對妻子名言之竟以疽發背死復剖棺梟首人以爲報施之應云漢田蚡論竇嬰灌夫弃市乃十二月晦也春蚡疾一身盡痛若有擊者嗥服謝罪上使視鬼者瞻之曰魏其侯與灌夫共守笞欲殺之竟死且見本傳二事正相類也



于肅愍公辟鬼

肅愍公爲諸生時忽窓外有巨人持一扇乞詩公醉中卽揮筆書曰大造乾坤手重扶社稷時其人大驚悲躍而去乃鬼也所遺扇則蕉葉一片耳余祖言之

夫母之妖

上虞民家母八十餘夏月風雨大作忽失所在其子追訪七八日無可踪跡遇樵人見于高山頂上端坐荆棘中間之不語乃呼其子視亦無知覺後數月乃復舊也又餘杭郭家妻婦纔十餘日行至竈前忽然不見家人尋覓不得後五日聞在山中已將死家人

往救醒問之云被三四人拖抱從屋脊上飛過與淫  
婦如醉夢中今偶從松樹墮下也後或看守不謹即  
又攝去其夫大懼乃賣于王新建家其妖始絕因憶  
古人所記鬼攝少年美姬者多矣未聞娶此老婦尤  
惟也

見鬼投井

張輝平南人廣西解元景泰元年爲香山教諭忽見  
官舍井中有紅衣人出而招之輝素有膽氣呵之走  
上蓮花峯而滅次日會飲縣堂與縣丞爭位交毆歸  
而投井死馮定蘇州人進士成化中以副使赴京聽  
選朝罷還至宗人府府中有一井甚大定忽下馬趨

至井旁顧其中拱揖者三四從者見之方驚駭定忽解帶置地涌身而入急救之死矣

雙修法

元西番僧伽璘真善秘密法謂順帝曰陛下雖尊居萬乘富有四海不保有見世而已人生能幾何當受此秘密大喜樂禪定帝習之名雙脩法又有運氣術名演揲兒法華言大喜樂皆房中術也號所處室曰皆即兀該華言事事無礙也今之夫婦雙修法禍起于此

五道將軍

今云五道將軍謂盜神也余意出于莊子佞篋篇盜亦有道妄意室中之藏聖也入先勇也出後義也知可否智也分均仁也是五者豈所謂五道邪又俗有游方五聖樹頭五聖花花五聖皆貪淫邪亂之神或曰卽五通也今之上官可謂之六道將軍矣客曰何也曰擄盜而納其財反不殺而縱之非六聖而何

禽獸變婦女

老狐能變婦人以媚人世所知也而海中紅裳魚亦能變山中釣星鳥亦能變一名夜行遊女衣毛則爲飛鳥脫毛則爲婦人能乳人子或云產死者所化

淫報

麋豷陰物也婦女多淫亂則生春秋書豷所以譏莊公也杜氏曰短狐洪範傳曰三足豷本草曰射工西方書言淫人受果報雀鴿鴛鴦蓋此物皆淫鳥也雀交不一四時有子九月入水爲蛤否則多淫泆鴿喜合逐月有子雌反乘雄吳趨有云鶉鴿檐前雌打雄是也書稱虫不再交者虎死央璫瑁也雄曰死雌曰央乃匹鳥未嘗相離失偶則思而死故曰死思今反云媚婦所變似與韓朋事異又食蟬噉令人善淫留青日札卷之二十八終